

海

國

圖

志

海國圖志卷十四

東南洋

海島之國
原無今補

邵陽魏源輯

葛雷巴所屬島

地里備考瓜哇島在蘇麻答刺東南長約二千四百里
寬約五百里岡陵層疊峯之峻者曰巴拉呼曰巴囊古
撓曰巴薩彎曰拉的科麻曰墨爾巴布曰松兵曰新多
羅河之長曰若阿那曰塞達尼田腴產豐穀果備具林
密獸蕃地氣熾烈歸賀蘭兼攝分二十部設總兵駐劄
五方輻輳其通商衝繁之地曰薩麻郎曰蘇拉巴亞曰

巴薩盧昂曰蘇拉加爾大

其餘各島一名馬都拉在瓜哇島之東北長約三百里寬約六十里地面積方一千八百里五穀之中秔稻爲最三酋分攝各據一方一名巴利又曰小瓜哇在瓜哇島之東長約二百七十里寬約一百六十里地面積方二千六百一十里田土肥饒地氣不馴土產金鹽稻粟縣花烟葉等物八酋分攝不相統屬一名隆波克在巴利島之東長約一百八十里寬約一百五十里崇山峻嶺峯巒參天田土膏腴五穀豐登一名君島在瓜哇島

之西北長約五十里寬約四十里田土低陷叢林稠密
此二島皆屬一會統攝

每月統紀傳曰三大州之至盛爲呀瓦米勝用胡椒燕
窩翠羽白饴絲花加非蘇木木頭等貨各樣果實蕉子
椰子檳榔石榴柚子波蘿柑子芒果橙橘等無所不備
恨水多鱷魚地有火山頻數地震火出燒樹屋居者皆
以炎暑爲患

土番皆回回甚老實勤勞耕田其本性溫和惟人觸犯
之內恨不釋一定雪怨瞋怒之際如虎遇人就殺不論

好、友、倘、不、觸、其、怒、安、然、秩、然、甚、惡、相、鬪、但、因、賭、博、之、好、
輸、田、屋、子、女、至、賣、身、爲、奴、偷、盜、哄、騙、皆、生、于、此、最、爲、呀
武、洲、風、俗、之、害、禮、拜、之、時、設、虎、與、牛、相、鬪、之、場、或、虎、牛
死、就、息、止、又、山、內、多、虎、土、番、打、圍、射、獵、

向、來、土、番、王、世、管、此、洲、守、天、竺、國、之、佛、教、天、順、年、間、同
同、伐、國、征、服、之、令、居、民、改、崇、同、教、萬、厯、年、間、荷、蘭、建、葛
刺、巴、城、以、爲、海、船、聚、集、貿、易、之、大、埠、番、人、罄、珍、寶、物、食
無、所、不、至、漸、漸、征、土、酋、而、服、之、令、其、人、進、貢、遵、總、兵、之
命、別、開、砥、利、文、島、蘇、拉、圭、呀、島、銀、馬、廊、島、各、埔、頭、並、荷

蘭公班衙爲主治管貿易倉箱充實任意奢侈不顧貧
窶結釁打仗自雍正年以後未有大釁隙卽有土番背
叛一霎時可服之乾隆年間荷蘭公使朝京都嘉慶年
間佛蘭西國勝服荷蘭祖家遂奪據葛刺巴是時英國
與佛蘭西方連年攻戰故英軍助荷蘭伐征呀瓦洲獲
勝數年後結平盟復以呀瓦地歸荷蘭道光年間土番
君題坡那哦羅者與土人謀廢荷蘭之權時荷蘭公班
徭已廢荷蘭王遣兵船戰鬪不息畢竟仍爲荷蘭所有
明朝年間唐人已到呀瓦大洲赴埔頭順治年福建同

安人離本地往駐葛刺巴、經商耕種、年結丁粟銀五六金、此後每每有廈門巨艚船載萬餘石赴葛刺巴兼鋤馬廊埔頭、但因水程甚遠、沙礁無數、必有西洋夥長、其用混天儀量天尺、較日所出刻量時辰、離水分度、用羅經刻漏沙、以風大小順逆較更數、卽知爲某處、近因中國人口浩盛、往此地何啻十餘萬、歸家鮮矣、作家業娶土女、故荷蘭總兵禁革新唐、不許居住、令隨船而回、然唐人士著、生長富貴人甚多、與荷蘭友睦交接、兼荷蘭亦用唐人爲官屬、爲保甲、名甲必丹、理國政、掌財賦、毗

於呀瓦之島等是巫來西族類土番所居兼蠻海賊無
數在地本嶼或地門嶼荷蘭與葡萄亞建城產檀木蜜
蠟等貨

葛雷巴士番有曰武吉族類者極勇猛飲血結盟死不
爽信好行船往四方生理措置新民極聰明又勤勞經
綿補葺之武吉人恭敬婦女不以婢妾待之故其女秉
心貞靜有大用因芒佳瑟之士君甚多頻數爭鬪不息
蓋回回之教不澤洽於兆民不酌定律例委曲詳明昭
示致相戰不息也

每月統紀傳曰葛刺巴地山嶺高千有餘丈別有火焰山發火焰硫磺似大砲之轟是時山內之石鎔如水流下凡所遇物卽燒滅之亦有大山頂上有穴隙周三四里深十餘丈底有熱水滾下滾上色如牛乳臭如硫磺所圍之孔噴出白烟終不可近自巴城而東隔三百餘里有大火山向來多次發火焰忽一日白雲覆山地震霹靂如萬炮齊轟居民率然驚起天無門地無路要避又避不得火山發煉石火灰滿田盈谷草木房屋皆火盡燒民三千人及十鄉毀盡大山沈陷斯災禍格外稀

奇一如天地之末劫然且離巴嶼千有餘里有三巴哇
海嶼嘉慶二十年三月其地火山忽然發焰冲天大石
飛起燒煉溶流房屋倒塌五穀盡壞萬有餘人滅亡也
巴城之中白日變暗火灰下如雨雪遮蓋房屋填塞街
路耳聽如雷響葛刺巴地不比中國之蕃庶雖田之廣
大有餘糧可多養幾萬人惟其居民生齒不繁且巴人
不建城而居鄉里或百人或五十人合住一村茅舍四
圍作園栽樹摘其果享其蔭因樹木茂盛遠望不見房
舍春季大雨淋漓水漲漫屋諸村如海嶼一村之居民

漸增日多，必挪移別所，又開墾焉。初建之時，新村屬舊村所管，漸設保長，每村內有鄉長數人，亦有公所會集商事之所，別建禮拜寺，及請教師掌理之。臣見王不穿袷衫，而着緞褲圍長布，其瓜亞王之宮殿，尤四方端正，闊十有餘里，萬人可居。城牆溝池周之，大火炮防之。殿前大門外有空院，籬笆圍四方，有榕樹甚古，爲御所之記號。前門有階，可登座位，到內門，透過裡院，行中道，至朝廷，羣臣來此朝見。後有王宮，皆甚雅麗。內地之居民，在本鄉保管下，樸實謙遜，相友相助，孝順父母，愛惜妻

子非邪僻、非驕傲、秩然藹然、惟大邑與華市之民、則不然、因與匪徒往來、放僻邪侈、不依古執、迷能做法、外國之文藝、亦輕信人言之哄騙、甚執妖鬼之誕、守邪術之法、富貴人爲世爵、非常暴虐、惟知積累財帛、勒索百姓、海口之人、斷非儉吝、賤錢卽費、買馬車器服、倘旅客到寓、厚待守賓主之禮、沽名邀譽、是瓜亞人所悅、雖不大膽、却許多忍耐磨難、還怨欺負、一轉眼發怒報仇、不顧關係矣、內山虎甚多、鄉人聽有虎、各持鎗圍虎穴、打鼓放火以激之、虎出、眾人殺之、亦有王家養虎囚於大籠

招民聚集放火焚籠虎走出之時諸人攻擊昔有犯死罪之人但其所供犯法無實憑據使之與虎相關若殺虎無罪被虎殺卽正罪也王家戲玩好將水牛與虎相鬪牛觸虎齧旁人或灑沸水或以荆棗激怒之水牛因力大常勝因被虎傷亦數日後而死巴民心性輕浮最喜小說甚悅虛談故本地史記粧飾參假漢朝光武帝時有五印度國人坐船到巴地交易貨物恆常往來因土番蠢蠻印度人教之建屋耕田傳佛教印度人漸富專權侵地土番甘心媚服雕刻石像建廟奉佛其跡處

處尙在元朝時有國曰摩瓜巴佚盛興征伐鄰民收服
回教以後回回力強令土番進教去除佛像奉事眞主
一位佛教日衰巴地之列王皆喪氣棄舊從新不敢抗
違老幼俱奉回回之教嗣後荷蘭人到洲爭據其地萬
厯二十年間回回百姓興兵如蟻集各國之人協力助
陣終無如荷蘭之火銃何土番四散奔逃自斯以後荷
蘭遂永管其地矣

外國史畧曰眾島之中牙瓦最貴古名小瓜哇今名葛
雷巴南極出自五度三十八分至六度四十分偏東自

一百零五度十一分及一百一十四度三十二分廣袤
二千七百四十五方圓里居民七百萬中地山高自五
百丈至一千二百丈其東方之山高於海面一千六十
一丈此山多峯有若火山近日火滅大半尙有數處出
硫磺氣牙瓦地多支溪當霖雨時可舟行者數十處餘
皆供灌溉田南北均有海灣可泊南有高磐北多低澤
甚烟瘴有泥火山恆流鹹水冲出黑泥其天氣谷熱而
山涼多大雷電地震天氣有六變故所產物亦殊異牙
瓦土肥出穀米又出白饒加非黛青胡椒胭脂八角馬

芹畢澄茄椰子茶葉及各種嘉果多蛇虎而水牛極高
有力不獨耕田亦可推車此島有八分之七未墾且不
善務農又官吏迫納餉賦故無餘蓄其土民大半紫黑
色樸實耐勞但不甚聰明惟上命是聽受虐不怨本奉
印度佛教明永樂三年有回回教師領大軍強服其土
民使棄偶像而拜回回教主元時亦入貢中國葡萄牙
船於萬厯間到此島與土民交易荷蘭與英人繼之嗣
後兩不相合荷蘭立城爲藩屬國之都力戰土酋服之
教種甘蔗加非等貨其利甚厚嘉慶十五年佛蘭西欲

據此島英人調兵先取之立法律力保土民通商旅二十年復以此地再還荷蘭當今居民五百有餘萬服荷蘭所轄者五分之三其餘屬土酋道光五年有土民糾海邊蕪來由族類起兵攻荷蘭連兩年不能克且頭日被擄荷蘭王益調兵帥掌全島之政每三年與議士斟酌法令所派各大官皆由荷蘭國至其餘小官皆生長此地且於僑寓唐人中擇立首領按本律例以管所屬之人又立各族類頭目使管本地之民惟聽荷蘭大帥之命所傳之兩舊土酋在內地安逸度生而已各島稅

賦每年銀一千八百萬兩除給各公費尙存庫百萬兩
調水師船數十巡羣島以遏海賊調兵守各埠約二萬
丁○運出之貨道光十六年加非六十二萬二千五百
九十七石白糖六十三萬六千八百九十一石米一百
九十萬二千九百石黛青四千零七十八石錫五萬九
千六百七十四石道光十八年加非七十二萬七千五
百石白糖九十一萬八千七百五十石米一百一十八
萬七千五百石黛青七千四百三十石錫五萬一千九
百六十六石其貿易可謂甚廣因多立禁諭商不得任

意運貨往來故有阻礙包攬之弊○荷蘭駐札之都曰
巴他威城在西南海邊居民六萬二千族類不一種北
面海口曰蘇拉拜居民五萬丁撒馬郎居民三萬八千
丁皆與他島貿易惟外國之船獨於巴他威或甲拉巴
通商焉內地土酋所駐之大城曰蘇拉甲他居民十萬
五千口儒約甲他十萬口其殿廷極廣大

馬士拉在牙瓦之東北邊隔以海峽居民二十二萬丁
崇印度佛教居民猛勇陣則爲荷蘭之助島長三里闊
約六里多出米穀以補他島在牙瓦各海口亦有唐人

經商致富○巴里島在牙瓦之東南隔以同名之海峽
南極出八度四十一分偏東一百一十四度二十五分
岸高難泊其居民尙執印度佛教屍皆焚葬其前君卒
如妾七十二人皆願自焚土人不善駕船出米油檳榔
燕窩等貨居民八十萬口鄉里長領之外餘悉貧乏自
道光十七年以來土酋各結黨互戰○屬此島之淪泊
有峯高八百丈南極八度二十一分偏東百一十六度
二十六分長十六里闊約十四里米穀豐盛每年三萬
有餘石載甲板賣與中國居民崇印度佛教頗勤勞安

分用中國之通寶錢，歷來小土酋結黨相殺，荷蘭人排兵船以定其爭，然終未太平。○距此島不遠爲孫巴瓦，長六百里，闊十三里，出堅木、駿馬、金沙，居民鮮少，未向化。罕與外國往來，有火山出火，石烟火漿，令四方震動。○弗力島在八九經度間，偏東自百二十至百二十三度，出金沙、椰油、檀香、蠟、燕窩、玳瑁等貨。前此荷蘭據其東方，今又有布吉據其地，與外國無往來。葡萄牙人在此傳天主教，築禮拜堂，土民面黑，喜鬪，有所獲則販賣。○地門島闊八百里，長約十三里，皆山地，出檀香。

每年約一萬石有金沙禁不准掘荷蘭人於此開礦土人殺之亦出銅蠟椰子椰油等貨崇耶穌教各鄉設學館此島分二分西分歸荷蘭其港口曰古邦東方歸葡萄牙築炮臺曰和睦每年由澳門開船前往買黑奴蠟檀香等貨雖設嚴禁犯者益多祇以人口爲買賣之物甚可恨矣其居民不似蕪來人髮鬢面黑皆土著不築航船○外此尙多嶼洲如鹿地檀香勒地等嶼皆小而微

葛雷巴島舊爲狼牙修沿革

梁豐扶南以南入海中爲頓遜國其西爲盤盤國又西南爲丹丹國海中有毘騫國去扶南八千里又西南爲干陀利干陀利國在南海洲上其俗與林邑扶南畧同出班布吉貝檳榔天監中其王遣使貢獻方物干陀利之西南爲狼牙修島又西南爲婆利島國再西南則中天竺再西南爲海中獅子國

按頓遜在扶南三千里斗入海中爲柔佛等地無疑毘騫去扶南八千里當是婆羅大洲干陀利在其西南當爲今下港而狼牙修又在其西南當爲

今葛雷巴之小瓜哇則正與婆利之爲蘇門島相
接地勢無一不合矣明史以狼牙修爲印度南之
師子國合爲一島又以干陀利爲三佛齊與婆利
合爲一島皆與史不合甚至以蘇門答刺爲條支
大食波斯之地則更無足辯矣

梁書狼牙修國在南海中其界東西二十日行南北二
十日行去廣州二萬四千里地氣物產與扶南同偏多
沈婆律香等其俗男女皆袒而被髮以吉貝爲干縵
及貴臣乃加雲霞布覆脚金繩爲絡金環貫耳女子

被布以纓絡繞身其國累樓爲城重門樓閣王乘象有
幡旄旗鼓臺蓋兵衛甚設國人說立國以來四百餘
年後嗣衰弱王族有賢者國人歸之王聞之乃加囚執
其鏢無故自斷王以爲神不敢害斥逐出境遂奔天竺
天竺妻以長女俄而狼牙王死大臣迎還爲王二十餘
年死子婆伽達多立天監十四年遣使阿撒多奉表

葛雷巴島舊爲閩婆小瓜哇沿革

唐書訶陵亦曰杜婆曰閩婆在南海中東距婆利西墮
婆登南瀕海北真臘木爲城覆屋以排欄象牙爲床席
出辟瘴黃白金犀象國最富有穴自湧鹽以椰花椰子
爲酒有文字知星歷王居閩婆城其祖吉延東遷于婆

露伽斯城旁小國二十八莫不臣服其官有三十二大
夫而大坐敢兄爲最貴山上有郎卑野州王常登以望
海夏至立八尺表景在表南二尺四寸貞觀中與墜利
羅墜婆登皆遣使入貢太宗以璽詔優答墜和羅丐良
馬帝與之上元間國人推女子爲王號悉莫威令整肅
道不拾遺大食君聞之齎金一囊置其郊行者輒避如
是三年王世子過以足躡金悉莫怒將斬之羣臣固請
悉莫曰而罪實本於足可斷趾羣臣復爲請乃斬指以
狗大食聞而畏之不敢加兵大厯元和太和中和皆入貢
采史闍婆國在南海中其國東至海一月汎海半月至
崑崙國西至海四十五日南至海三日汎海五日至大
食國北至海四日西北汎海十五日至勃泥國又十五
日至三佛齊國又七日至古邏國又七日至柴厯亭抵
交阯達廣州其地平坦宜種植產稻麻栗豆無麥民輸
十一之租煮海爲鹽多魚蟹雞鴨山羊兼椎牛以食果
實有木瓜椰子蕉芋出金銀犀牙箋沉檀香茴香
胡椒檳榔硫磺紅花蘇木亦務蠶織有薄絹絲絞吉貝
布剪銀葉爲錢博易官以粟一斛二斗博金一錢室宇

壯麗飾以金碧中國賈人至者待以賓館飲食豐潔地
不產茶其酒出於椰子及蝦蟇丹樹華人未嘗見或以
枕櫛檳榔釀成亦甚香美不設刑禁雜犯罪者隨輕重
出黃金以贖惟寇盜者殺之其王椎髻戴金鈴衣錦袍
躡革履坐方牀官吏日謁三拜而退出入乘象或腰與
壯士五七百人執兵器以從國人見王皆坐俟其過乃
起以王子三人爲副王官有落佶連四人共治國事如
中國宰相無月奉隨時量給土產諸物次有文吏三百
餘員目爲秀才掌文簿總計財貨又有卑官殆千百分
主城池帑廩及軍卒其領兵者每半歲給金十兩勝兵
三萬每半歲亦給金有差土俗婚聘無媒妁但納黃金
於女家以娶之五月遊船十月遊山樂有橫笛鼓板亦
能舞土人被髮其衣裝纏胸以下至於膝疾病不服藥
但禱神求佛其俗有名而無姓先是宋元嘉十二年遣
使朝貢後絕渚化三年貢象牙真珠繡花銷金及繡絲
絞雜色絲絞吉貝織雜色絞布檀香玳瑁檳榔盤犀裝
劍金銀裝劍藤花簪白鸚鵡七寶飾檀香亭子其使別
貢玳瑁龍腦丁香藤織花簪至明州定海縣其使飾服

與嘗來入貢波斯相類其國與三佛齊有仇怨互相攻
戰本國山多猴不畏人呼以霄霄之聲卽出或投以果
實則其大猴二先至土人謂之猴王猴夫人食畢羣猴
食其餘使既至上令有司優待久之使還賜金帛甚厚
仍賜良馬戎具以從其請其言鄰國名婆羅門云大觀
三年六月遣使入貢詔禮之如交趾又有摩國太平興
國七年載寶貨至廣州海岸南毘國在大海之西南出
三佛齊風驅月餘可至其國王每巡行先期遣兵百餘
人持水酒地上以防颶風揚沙塵列鼎百以進食日一
易之置翰林官供王飲食俗喜戰鬪習刀稍善射鑿雜
白銀爲錢產珍珠番布其國最遠番船罕到時羅巴智
力干父子其種類也居泉之城南自是船舶多至其國
矣

廣東通志瓜哇國古詞陵也一日閩婆又名蒲家龍在
真臘之南海中洲上東與婆利西與隋婆登北接真臘
國南臨大海自占城起程順風二十晝夜可至其國地
廣入稠甲兵藥銃爲東洋諸番之雄其港口入去馬頭
日新村屋店連行爲市買賣商旅最眾三佛齊國爲其

所并改名舊港以別於新村源按并三佛齊者乃大瓜哇非此小瓜哇也

明史閩婆宋元嘉時始朝中國唐曰訶陵又曰社婆其王居閩婆城唐宋皆入貢洪武十一年遣使表貢其後不復至或曰瓜哇卽閩婆然元史瓜哇傳不言且曰其風俗物產無可考而太祖時兩國並時入貢其王之名不同或本爲二國其後爲瓜哇所滅然不可考源案閩婆爲下港小瓜哇爲葛雷巴諸書皆以瓜哇卽閩婆獨此分之然尙與大瓜哇相混

魏源曰葛雷巴昔爲小瓜哇今爲小新荷蘭其與下港僅隔一峽凡西洋南洋之番船必遶過峽中而後分赴各國故帆檣屢市雄甲南海視婆羅洲之大瓜哇尤繁盛荷蘭之有小瓜哇猶英吉利之有東印度凡各島駐

防之兵均皆聽號令受節制焉其并于天方也在明天
順吞于荷蘭也在明萬厯交關于佛蘭西英吉利也在
嘉慶之初天方之服之也以同教荷蘭之蠱之也以鴉
煙皆陰謀潛伏于無形而奪人家國氣運所遷機智所
闕烏乎安所極哉諸書或以閩婆卽瓜哇或以噶雷巴
卽大瓜哇而下港爲小瓜哇甚至謂瓜哇疆域南抵大
食而以西南之蘇門答刺當之不知唐書大食王遣人
囊金閩婆之郊陰試女王之令者蓋商船往來速郵傳
命詎真謂萬里波斯之國雞犬相聞明洪武中命外夷

山川附祭各省、安南、占城、真臘、暹羅、鎖里附祭、廣西、三
佛齊、小瓜哇附祭、廣東、日本、琉球、淳泥附祭、福建、今則
大半歸于西洋

海國圖志卷十五

東南洋

海島之國
原無今補

邵陽魏源輯

英荷二夷所屬亞齊及三佛齊島

三國同島即唐以前婆利洲地

蘇門答刺今名亞齊
三佛齊今名舊港

謝清高海錄曰三佛齊及蘇門答刺島在新柔佛島對渡舊柔佛爲英吉利所據其土番徙新島周圍數百里由柔佛島對渡西南海中別峙一大洲九國環之曰雷里曰錫里曰大亞齊曰小亞齊曰尼古巴拉曰蘇蘇曰叭當曰尼是曰茫古魯曰舊港曰龍牙九國同此一山

亞齊及蘇蘇皆蘇門答刺故地舊港則三佛齊故地也
雷里國在柔佛西南不與柔佛相連由柔佛渡海而南
行約日餘可到疆域約數百里風俗土產與柔佛同土
番較強盛潮州人多貿易於此海東北爲琴山徑

錫里國在雷里西北疆域風俗與雷里同由雷里買小
舟沿海行約四日可到海東爲麻六甲由此又西北行
約二日仍經紅毛淺土產魚肚冰片椰子胡椒

大亞齊國在錫里西北疆域稍大由紅毛淺外海西北
行日餘即到由國都向西北陸行丘六日水路順風一

二日則至山盡處俱屬大亞齊風俗與無來由各國同
海東北岸爲沙喇我國山盡處則與新埠斜對土產金
冰片沙藤椰子香木海菜

尼古巴拉西南海中孤島也由亞齊山盡處北行少西
順風約十一二日可到土番俱野人性情淳良日食椰
子熟魚不食五穀閩人居吉德者常偕吉德土番到此
採海參及龍涎香其海道亦向西北約旬日可到由此
又北行約半日許有牛頭馬面山其人多人身馬面嗜
食人海艘經過俱不敢近望之但見雲氣屯積天日晴

朗遙見山頂似有火燄焉。又北行旬日，卽到明牙喇海口。若向北少西行，順風六七日，可到曼達喇薩。

小亞齊國一名孫支，在大亞齊西。由大亞齊西北行，經山盡處，轉東南行，約日餘，可到疆域。亦數百里，風俗與大亞齊同。土產金沙、藤、胡椒、椰子、冰片。

蘇蘇國在小亞齊南。水路順風，約二日，可到疆域。風俗土產與小亞齊同。

叭當國在蘇蘇東南。水路順風，亦二日，可到疆域。風俗與上畧同。海西別有一島，爲呢是國。

呢是國又名哇德在蘇蘇叭當二國之西海中獨峙一
山民似中國而小常相擄掠販賣出入必持標鎗懼礮
火不食五穀惟以西穀米合香蕉煎食年老者子孫則
抱置樹杪環其下而搖之俟跌死而後已其滅倫理至
於此極自此以西海中多大石風濤險阻故大西洋海
舶往小西洋者必由叭當之西呢是之東茫古魯在巴
當東水路順風約五六日可到陸路亦通但山僻多盜
賊故鮮有行者沿海都邑近爲又吉利所奪國王移居
山內然英吉利居此者不過數十人領跋兵數百而已

土產海參丁香豆蔻胡椒椰子檳榔

舊港國卽三佛齊也在茫古魯東疆域稍大由古東南行約三四日轉北入葛刺巴峽口順風行半日方出峽峽東西皆舊港國疆土峽西大山名網甲別峙海中山麓有文都上盧寮下盧寮新港等處山南復有二小島一名空壳檳榔一名朱麻里皆產錫閩粵人到此採錫者甚眾文都有英吉利鎮守而權錫稅凡採者俱向借貸斧得錫則償之每百斤止給洋銀八枚無敢私賣國王所都在峽西由文都對海入小港西行四五日方至

亦有荷蘭鎮守兩岸居民俱臨水起屋頗稱富庶國王
殿廷爲三級每日聽政王坐于上次列各酋長庶民爭
訟者俱俯伏於下體制嚴肅而民性兇惡多爲盜賊不
知尊中國而畏荷蘭英吉利如虎凡有誅求無敢違抗
巫來由番皆然不獨此國也土產金錫沙藤速香降香
胡椒椰子檳榔水鹿

龍牙國在舊港北由峽口水路到此順風約三日由此
北行日餘則爲柔佛西北行日餘則至雷里此山多木
大者數十圍中華洋船至此多換桅柁凡雷里錫里大

抵皆巫來由種類唯大亞齊及蘇蘇民稍淳良餘俱兇惡盜劫爲生凡巫來由各國俱產黑燕窩速香降香雞骨香檳榔椰子海菜

地里備考曰蘇麻答刺島亦曰蘇門答刺在南洋之極西緯度自北五度起至南五度止經度自東九十三度起至一百零三度止長約三千五百里寬約五百五十里烟戶六兆餘口本島地勢重岡疊嶺迤邐延袤其最大者曰柯非爾山曰古農哥孫巴拉山火山不一地震時作田土膴腴穀果豐稔叢林稠密禽獸蕃衍土產金

銀銅鐵錫硝磺冰片胡椒椰子甘蔗藥材沙谷米等物
地氣互異每多陰雨商賈雲集本島疆域不屬別國管
轄惟一處歸賀蘭國兼攝其自爲國者三曰亞齊在島
之北疆域狹窄人烟稀疎都城建於西北屋宇樸陋街
衢灣曲曰西亞哥在島東之西亞哥河兩岸數酋分攝
各霸一方海濱之人多務劫掠都城貿易蕭條曰巴達
斯在島西海濱與亞齊毗連數酋分攝不相統屬其歸
賀蘭攝者一名巴當在島之西地勢褊小貿易則盛一
名美囊加布在島之中一名巴稜邦在島之東田土肥

饒稼穡豐茂一名檳榔在島之南地多涔澤人烟稀疏
島之東西小島臚列各設酋長東島一名盧巴一名邦
八爾一名靈安長約一百八十里寬約一百里一名兵
當長約一百里寬約四十里一名當容比囊內有里約
城商賈輻輳一名邦加長約五百四十里寬約一百五
十里人烟寥落錫礦繁衍一名比莽敦多產黑金西島
一名英加諾迴環約一百里田土膴腴地氣嚴寒一名
波日又曰那搔島嶼甚多不產秔稻椰竹沙谷米等甚
屬蕃衍一名波拉又曰細波拉島嶼不一大者長約三

百里寬約六十里一名細比盧長約二百七十里寬約四十里內有火山晝夜吐燄不熄一名巴都一名尼亞斯長約一百八十里寬約六十里田土膏腴穀菓豐稔一名巴比一名巴比亞哥長約六十里寬約二十里每月統紀傳曰蘇門答刺大州嶼一帶皆山於其州中間分州兩分瘦嶺磽地只產錫金沙藤胡椒檳榔椰子冰片等貨英吉利人又種豆蔻丁香樹其金鳳有大聲名不勝其美土番皆馬來西族類不勝數同民居住由來已久強悍刁頑肆爲不法年年往默底那國拜其聖

人穆罕默德鐵棺椁各處皆有。小土酋沿溪居茅，不善生理，故上下窮苦。唐時爲亞齊國，權勢甚大。今則西洋藩屬。

外國史畧曰：蘇門他拉此爲長島，與牙瓦島以孫他海峽相隔，長約二千五百里，闊約五百五十里。地分三分，東北甚低，有血蜴產沙米穀米，安息香，大河由此入海。海濱出胡椒，地雖低，無大澤。西北高，多出檳榔，中多高山，有千三百八十四丈。山下廣坦，暑月亦涼，土人樂之。亦多湖澤，西則溪川四處灌漑，地常震，火山出火漿，又

多金銅鐵硫磺等礦石炭石油硝等物但居民未悉采
取之法金礦每年可出三萬兩游山者或偶遇之有一
塊重九兩者其穀僅足居民食用惜地未開墾草木暢
茂爲野獸之藪產胡椒檳榔及冰片之樹計冰片數斤
必伐木三百株惟中國貴之每年運出六千六百五十
斤耕田以水牛林多象犀虎猴狒狒水中多蝦蟆蛤蜊
蟒蝮林中有金雞神鷹鶴鵲鸚鵡運出之物如安息
香桂皮蘇花加非等貨計萬萬石又有乳香楠沉紅木
烏木等料居民多蕪來由族類崇回回教其教師嚴禁

鴉片及各葷物民色紫尊貴人以金鑲齒居民恆帶短刀有要事則誓諸墓以舊器爲盟在海口販人爲奴百姓不好城居自建鄉里竹葵爲寮食不用箸以手搏之飯惟魚蝦花椒等物以老男女爲醫生不必通其藝隨意令病者服藥教外之人皆好賭博食鴉片海邊居民以搶劫商船爲事其內地民則樸實有大城曰黑襲加報城亦蕪來由族類此族人在元以前獨住蘇門他拉一島後散布羣島不啻千萬仍以此城爲聖域赴其廟以祀神地多產金居民皆造金器亦善造火器火藥短

刀乾隆間土酋互相戰鬪嘉慶間請荷蘭兵助遏其教
師荷蘭遂據其地○蘇島有名之國曰亞珍或曰亞齊
昔與中國通其君住草舍道甚微居民憚勞苦○此國
之南方有巴答蠻者雖向化辯字務農卻食人肉戰則
虜人爲糧或父母老邁卽食其肉昔耶穌教師至此欲
化之爲土民所殺後遂無入境者在南方有離利讓等
族類崇佛教其民情貧○明萬厯間葡萄牙船到此島
通商與海賊肇衅英人隨之在西南海邊開賓古林埠
二百餘年以胡椒貿易乾隆年間始種丁香豆蔻後以

此地讓荷蘭順治年間在西海邊開巴當海口亦在東邊占巴林邦所據之地道光年間始爲全島之主由此衅起與土人久戰亡其軍再戰始勝之然耗兵糜餉始令民種加非樹土產日增惟西北各金山歸荷蘭唐船每年有一二到巴林邦口買沙藤錫胡椒等貨海邊又任漢人開市百姓爲荷蘭管束不敢遠出

附近此島各地一曰罔加島在蘇門之東其地磽產紅石錫礦甚盛每年出六十萬餘石爲荷蘭所轄廣東嘉應州人多在此開錫山收餉頗重一曰北里屯島距罔

加不遠多海賊航船者難之○又蘇門西爲尼押羣島居民愚蠢蕪來由虜賣之爲奴地亦豐盛惜無人開墾

亞齊舊港卽古婆利沿革考

梁書曰婆利國在廣州廣南海州上去廣州二月日行國界東西五十日行南北二十日行有一百三十六聚氣暑如盛夏穀一歲再熟草木常榮海出文螺紫貝有石名蚶貝羅初采柔輒刻削爲物乾之遂堅國人披吉貝如帔及爲都纓王乃用班絲布以嬰絡繞身頭著金冠高尺餘形如弁綴以七寶帶金裝劍偏踞金高坐銀

踏支足侍女皆爲金花雜寶之飾持白毼拂及孔雀扇王以象駕輿輿以雜香爲之上施羽蓋珠簾導從吹螺擊鼓王姓陳憐如自古未通中國言白淨王夫人卽其國女天監十六年入貢

明史蘇門剗刺在滿刺加之西順風九晝夜可至或言卽漢條枝唐波斯大食二國地西洋要會也成祖初遣使以卽位詔諭其國永樂元年遣使賜其會織金文綺中官尹慶使瓜哇使道復使其國其酋遣使朝獻詔封爲國王遂比年入貢而鄭和凡三使其國先是王之父與鄰國花面王戰中矢死王子年幼有漁翁率國人往擊賊其王而還王妻遂與之合稱爲老王王旣而王子年長復殺老王而襲其位及是鄭和至其國老王弟蘇幹刺以頒賜不及已怒統數萬人邀擊和勒步卒及國人禦之大破賊眾追至南渤利國俘以歸宣德五年帝以

外番貢使多不至遣和及王景宏遍歷諸國頒詔凡歷
二十餘國明年遣使入貢者再八年貢麒麟九年王弟
哈利之漢來朝卒於京成化二十二年其使者至廣東
有司驗無印信勘合乃藏其表於庫卻還其使別遣番
人輸貢物京師稍有給賜自後貢使不至迨萬厯間國
兩易姓初其國有大臣握兵權大臣有奴桀黠出謂其
主曰國王左右侍衛少主擁重兵出鎮必入辭請以奴
從主言有機事乞屏左右奴乘間刺殺之大呼曰王不
道吾殺之吾主即王矣敢異議者血此刃眾懾服不敢
動其主遂篡位任奴爲心腹委以兵柄未幾奴復弑主
而代之乃大爲防衛拓其宮建六門不得闌入雖勳貴
不得帶刀上殿出乘象象駕亭而帷其外如是者百餘
傳人莫測王所在其國俗頗淳出言柔順惟王好殺歲
殺十餘人取其血浴身謂可除疾貢物有寶石瑪瑙水
晶石青同同青善馬犀牛龍涎香沉香速香木香丁香
降真香刀弓錫鎖服胡椒蘇木硫黃之屬貨舶至貿易
稱平地本瘠無麥有禾禾一歲二稔四方商賈輻輳華
人往者以地遠價高獲利倍他國其氣候朝如夏暮如

秋夏有瘴氣婦人裸體惟腰圍一布其他風俗類滿刺
加基弒後易國名曰亞齊又有須文達那者古不知何
國洪武十六年來貢或言須文達那即蘇門答刺洪武
時初更然其貢物與王之名皆不同無可考
皇清通考四裔門亞齊在西南海中相傳舊爲蘇門答
刺國名萬厯中乃易今稱其王嚴防衛拓宮殿建六門
雖勳貴不得帶刀上殿出乘象象駕亭而帷其外如是
者百餘俾人莫測王所在云風俗男女穿長衣頭纏白
布土產西洋布丁香肉果水安息蘇合油之屬地本瘠
無麥有禾一歲二稔市道稱平內地商船常往其地貿
易宋史三佛齊國蓋南蠻之別種與占城爲隣居真臘
開婆之間所管十五州土產紅藤紫礦箋沉香檳榔子
無緡錢土俗以金銀貿易諸物四時之氣多熱少寒冬
無霜雪人用香油塗身其地無木有米及青白豆雞魚
鷺鴨頗類中土有花酒椰子酒檳榔酒蜜酒皆非麴蘖
所釀飲之亦醲樂有小琴小鼓昆崙奴踏曲爲樂國中
文字用梵書以其王指環爲印亦有中國文字上章表
即用焉累贅爲城周數十里用椰葉覆屋人民散居城

外不輸租賦有所征伐隨時調發立集酋長率領皆自
備兵器糧糗汎海使風二十日至廣州其王號詹卑其
國居人多蒲姓唐天祐元年宋建隆

元年皆來朝貢終宋世職貢不絕

明史三佛齊傳三佛齊古名千陀利宋孝武帝時嘗遣
使奉貢梁武帝時數至宋名三佛齊修貢不絕洪武三
年太祖遣行人趙述詔諭其國明年遣使奉表隨入朝
貢方物詔賜大統歷及綿綺有差其貨船至泉州者命
勿徵稅時其國有三王八年九月遣使隨招諭拂菻國
朝使入貢洪武九年遣使貢犀牛黑熊火雞白猿紅綠
鸚鵡龜筒及丁香冰腦諸物其使者言先王歿嗣子不
敢擅立請命于朝詔遣使齎印敕封爲三佛齊國王是
時瓜哇強已威服三佛齊而役屬之聞天朝封爲國王
與已埒大怒遣人誘朝使邀殺之天子亦不能問罪自
是其國益衰貢使遂絕洪武三十年八月禮官以諸番
人缺貢奏聞帝曰洪武初諸番貢使不絕邇者安南占
城眞臘暹羅瓜哇大琉球三佛齊渤泥彭亨百花蘇門
答刺西洋等三十國以胡惟庸作亂三佛齊乃生間諜

給我使臣至彼瓜哇王聞知遣人戒飭禮送還朝由是商旅阻遏諸國之意不通惟安南古城真臘暹羅大琉球朝貢如故大琉球且遣子弟入學凡諸番國使臣來者皆以禮待之我視諸國不薄未知諸國心若何今欲遣使瓜哇恐三佛齊中途阻之聞三佛齊本瓜哇屬國可述朕意移咨暹羅俾轉達瓜哇然是時瓜哇已破三佛齊據其國改其名曰舊港三佛齊遂亡國中大亂瓜哇亦不能盡有其地華人流寓者往往起而據之有梁道明者廣州南海縣人久居其國閩粵軍民汎海從之者數千家遂推道明爲首雄視一方會指揮孫欽使海外遇其子挾與俱來永樂三年遣使齎敕招之隨使入朝四年舊港頭目陳祖義梁道明各遣其子來朝祖義亦廣東人雖朝貢而爲盜海上貢使往來者苦之五年鄭和自西洋還遣人招諭之祖義詐降而潛謀邀劫有施晉卿者告於和祖義來襲被擒獻於朝伏誅命設舊港宣慰司以晉卿爲使賜詰印及冠帶自是屢入貢然進卿雖受朝命猶服屬瓜哇其地狹小非故時三佛齊比也嘉靖末廣東大盜張璉作以官軍已報克獲萬厯

五年商人詣舊港者見礎列肆爲番舶長潭泉人多附
之猶中國市舶官云其地爲諸番要會在瓜哇之西順
風八晝夜可至轄十五洲土沃宜稼語云一年種穀三
年生金言收穫盛而貿金多也俗富好淫習于水戰隣
國畏之地多水惟部領陸居庶民皆水居編筏築室繫
之于椿水漲則筏浮無沉溺患欲徙則拔椿去之不費
財力下稱其上曰詹卑猶國君也後大酋所居卽號詹
卑國而故都則改爲舊港初本富饒自爲瓜哇破滅後
漸至蕭索商舶亦鮮至其
地風俗物產俱詳宋史
瀝涯勝覽舊港古號三佛齊曰渤湫邦隸瓜哇東距瓜
哇西距滿刺加南距大山自西北濱海船入淡港入彭
家裏舍易小舟入港達其國國人多廣東漳泉人流寓
土沃人稠宜稼穡俗好賭博如把龜奕棋鬪雞皆索錢
具也市亦用中國銅錢布帛之類厥產鶴頂黃連降真
沉水香黃蠟食炭神鹿毳啖草木不近腥物雖繫之不
死牛羊猪犬雞鴨蔬
果之類與瓜哇同

明張爽東西洋筴舊港古三佛齊國也初名干陀利又名渤淋在東南海中本南蠻別種居眞臘瓜哇之間王號詹卑故令王所部爲詹卑國而故都爲瓜哇所破更名舊港以別于彼之新村云語其地故稱沃土商舟至獻果幣有成數居人商量物價雖議價金多少然非償金實償椒也如值金二兩則償椒百石其大較云喜買夷婦他國多載女子易其椒以歸舊港則用銅錢矣三佛齊風稱蕃盛國破以後滿目蕭條賈人亦希造

魏源曰三佛齊國自宋以來臣服中國蘇門答刺亦終明世職貢不衰 國朝獨不列王會之圖則知爲西夷窟穴久矣其地自宋以前則爲婆利洲梁隋唐皆入貢而隋唐書言婆利國自交趾浮海南過赤土丹丹乃至其國國界東西四月行南北四十五日行赤土卽古

扶南今暹羅而丹丹卽今柔佛等國地望相準且唐以後無婆利宋以前無三佛齊今此昔彼亦沿革相承又史言婆利東西南北數千里爲海南大國舍是島外更無大洲足當婆利故壤者斷非明史南渤利南巫里梨我阿魯那孤兒等小嶼居民千餘家之倫至明史沿王圻之謬以蘇門答刺爲古大食波斯等國烏乎何以至是

荷佛二夷所屬美洛居島

一作馬路古、一作木路各一作摩鹿加各原無今補

明史美洛居俗訛爲米六合居東海中頗稱饒富酋出威儀甚備所部合掌伏道旁男子削髮女椎結地有香山雨後香墮沿流滿地居民拾取不竭其酋委積充棟以待商舶之售東洋不產丁香獨此地有之可以辟邪故華人多市易萬厯時佛郎機來攻其酋戰敗請降歲以丁香充貢不設戍兵而去己紅毛番橫海上知佛郎機兵已退乘虛直抵城下執其酋語之曰若善事我我爲若主殊勝佛郎機也酋不得已復聽命佛郎機酋聞

之大怒率兵來攻值紅毛番已去遂破美洛居殺其酋
立已所親信主之無何紅毛番至又破其城逐佛郎機
所立酋而立美洛居故王之子自是歲歲構兵人不堪
命華人流寓者游說兩國令各罷兵分國萬老高山爲
界山以北屬紅毛番南屬佛郎機始稍休息而美洛居
竟爲兩國所分

南懷仁坤輿圖說呂宋之南有太路各島無五穀出沙
谷米是一木磨粉而成產丁香胡椒二樹天下所無惟
本處折枝插地卽活性最熱祛淫氣與水酒同貯卽吸
乾樹旁不生草土人欲除草折其枝插地草卽立枯又
產異羊牝牡皆有乳有大龜一
殼可容一人或用爲盾以禦敵

地理備考曰美洛居島亦號米六合亦號麼魯加與在南洋之西塞勒卑斯島之東緯度自北三度起至南十度止經度自東一百十七度起至一百三十度止島嶼紛繁火山不一地震時作每有不虞地氣淫熱不便居棲田土互異土產各殊島中或設酋長管理或附賀蘭總兵統攝島之大者曰安波義那長約二百里寬約三十里田地肥饒地氣炎熱土產硫磺丁香加非藍靛沙谷米等物樹木充斥東方爲最禽獸蕃衍鱗介庶衆曰塞郎長約七百五十里寬約一百五十里山勢峻峭田土應腴五穀百果靡弗豐登諸酋分攝各據一方曰布盧迴環約一百七十里地面積方約二千六百里岡陵巍峩川河紛繁土肥穀豐毛羽鱗介充斥諸酋分攝各霸一方曰邦達內計十島皆有火山地震時作地氣不馴有礙居棲其內義辣郎多義爾古農阿比不慮阿義乃十島中之大者皆屬賀蘭國兼攝曰濟羅洛又名阿拉馬厄辣長約八百里寬約一百五十里境土錯落不相聯絡山土應厚物產豐饒地氣炎熱不便居棲島分三屬北屬德爾那的島酋長兼攝南屬的德爾島酋長

兼攝中爲本島諸酋分轄不相統屬其南北二處於道光四年有荷蘭國總兵駐劄於此始爲兼攝曰德爾那的迴環約九十里內有火山晝夜吐燄田土膏腴金砂實繁島中一酋統攝亦歸賀蘭兼轄曰的德爾長約十里寬約八里本島較德爾那的雖小而庶民則過之一酋統攝亦屬賀蘭兼轄曰巴將長約二百里寬約四十里田土肥饒穀果豐茂金礦蕃衍一酋管理曰大科比長約二百五十里寬約四十里田地土產與巴將島杞等諸酋分攝各霸一方曰迷索爾長約一百七十里寬約五十里諸酋分攝不相統屬曰波波乃眾島總名也大者亦名波波迴環約百七十里一酋管屬曰麼爾帶長約二百二十里寬約六十里田土膴腴人烟寥落歸于德爾那的島酋長兼攝不相統屬曰門日斯乃眾島總名也大者三島皆歸明達撓島酋長兼攝外國史畧曰東南各嶼曰摩鹿加島一作美洛居地磽出粟蕃薯並無米多火山多地震山爲谷爲湖所常見也居民樸實出丁香玉果出售遠商與荷蘭往來多奉耶穌之教亦有同同族自爲教門明萬厯間葡萄牙

初到開埠與土君戰是班亞兵船亦爭此地荷蘭遂乘
間而據是嶼後各島歸荷蘭包攬丁香玉果之貿易且
論土民盡伐其樹令他國無可買處如結果太過恐以
是減其價即燒此果每年出丁香約六千石玉果約七
千石豆蔻花約二千石大半售於歐羅巴各國他島近
亦種是樹價終減焉荷蘭調軍士數千駐安本島築礮
臺其班他悉蘭在北方黃道之內特那地乃大山島義
羅羅大嶼大半荒蕪主拉島地突島摩得島馬善布羅
島出好檀香並花木○荷蘭各藩屬在羣島之中廣袤
方圓共萬六千四百里居民千四百六十四萬四千俱
聽荷蘭之命各島廣袤方圓七千九百
五十五里居民三百八十五萬一千口
萬國地理全圖集曰摩鹿加羣島在小呂宋之南全歸
荷蘭轄居民大半奉耶穌教地出丁香玉果豆蔻蘇木
等貨各島總帥駐在安門北極出三度四十分偏東一
百二十八度海口建礮臺有萬他不離地內有火山常
地震玉果豐積足以補列國之用西蘭長嶼出沙沒米
但民不耕用故由他嶼運買其居民尚野未向化德拿

地小嶼稱樂土周年天氣和暖但內地火山一動鄰地
遍焚燬提讀島上有土君亦管義羅羅島也出丁香玉
果但荷蘭人不準運賣巴治安島又歸同土君所治
明隆慶年間葡萄牙人之船始到德島不期是班牙人
亦至與葡接戰泰昌年間惟荷蘭乘機力攻兩國驛其
駐防兵嚴守其權歷二百年不廢但所發賣丁香豆蔻
等物不足以資國費又絕他國船隻往來買賣是以生
意不盛○又曰摩鹿加之西至牙瓦島一帶嶼曰亞羅
地門律兩島土蠻人居佳不與外國交通武羅乃荷蘭
埔頭少民人少物產地門出蠟檀香東方葡萄牙居之
西則荷蘭之埔頭曰古邦西南曰檀香嶼北係佛理嶼
西日遜巴瓦倫泊巴理等島皆出米居民尚奉佛教未
化向

每月統紀傳曰美洛居嶼等與巴布阿大洲皆荷蘭管
下本產豆蔻丁香每年數萬石惟荷蘭可載運出之谷
島等因山嶺多石故無米土番食沙穀米卽是樹髓居
民事救世主耶穌崇拜上帝與荷蘭交友只恨人都安

逸偷閒其都會爲安門是荷蘭總管所治又有那巴布
阿之土番欲娶妻必以人獻爲聘故好殺人而寶其顱
面黑性蠻有鸚鵡言鳥各類果食數種蓋土番可畏商
舟往貿易者鮮矣道光十年荷蘭王差人建礮臺城池
以防海口教習土番耕田作工以調理之又曰萬占累
巴當二島西南海濱巴鄰綱甲二島在東北海濱爲荷
蘭所管建礮臺開埔頭因良久與山內之白頭回回僧
戰鬪不息故其地官府時時防範巴鄰綱甲沿溪樓閣
羣居廣東船進江買胡椒藤錫等貨勒索太甚萬古累
先爲英國藩屬地因公費過于稅入故以麻刺甲邑易
之萬古累地丁香樹胡椒園不勝數惟種之者無利綱
申嶼附蘇門答刺洲歲出錫幾萬石故荷蘭設官發賣
且廣東人開錫山甚難米食物都
由外國運出蓋其地爲石山而已
又曰檳榔嶼亦是英國所管附大山乾隆年間英國人
開此地方並作胡椒丁香園故息力檳榔嶼之屋不勝
光耀○島之南北大島六曰桑濟爾曰西昂
曰邦加曰耆拉曰布敦曰薩拉夜爾餘不記

又曰閩堂嶼是荷蘭所管有礮臺在山嶺及大營汛其產物爲胡椒等貨潮州府人耕田買賣向有幾萬今其數漸減馬萊西君惟治各小嶼因馬

萊西之族類懶惰窮苦并米皆無

地理備考曰塞勒卑斯島在南洋之西婆羅美洛居二

島之間緯度自北二度起至南六度止經度自東一百

十七度起至一百二十三度止南北相距約一千七百

里東西相去約七百里烟戶三兆餘口本島地勢錯落

不相聯絡田土極腴穀果最豐叢林稠密木多上品地

氣熾烈海風清涼土產金鐵硫磺水晶杭稻蘇花丁香

豆蔻島木檀香椰子沙穀米各等物島中朝綱兩端一

係賀蘭派官鎮守一係自設土酋仍附賀蘭其賀蘭派

官者有四一名馬加薩又名茫加薩在島之西南貿易

興隆尙賈雲集一名賓達音在島之南去馬加薩二百

五十里一名馬羅斯在島之北去馬加薩一百二十里

一名馬那多在島之東北諸貨駢臻其自設土酋者數

國工相結盟曰波尼曰瓦八曰盧呼曰馬加薩爾曰曼

達爾曰達內德曰索尼曰昔德靈白翁古宜辣曰哥阿

明史丁機宜瓜哇屬國也幅員甚狹僅千餘家柔佛點而雄丁機宜與接壤時被其患後以厚幣求昏稍獲甯處民俗類瓜哇物產悉如柔佛華人往商交易甚平自爲柔佛所破往者亦鮮又蘇吉丹瓜哇屬國後訛爲思吉港國在山中止數聚落又有碟里國日羅夏治國皆近瓜哇於永樂初入貢明史合苗里海中小國也土瘠多山山外大海饒有魚蟲人知耕稼永樂三年遣使附瓜哇使臣朝貢其國又名苗里務近呂宋商船往來漸成富壤華人入其國不敢欺凌市法最平故華人爲之語曰若要富須往苗里務有網巾礁腦者最兇悍海上行劫因是苗里務商船亦稀地漸貧困海國聞見錄曰呂宋下接利仔天水程十二更至甘馬力水程二十一更二處漢人從呂宋舟楫往彼貿易利仔天之東南隔海對峙有五島曰班愛曰惡黨曰宿務曰苗務煙曰網巾礁腦均土番族類山海所產與呂宋同水程必由呂宋之利仔天海而南呂宋至班愛十更至惡黨二十三更至宿務二十四更至網巾礁腦五十

入東人愚罔知識國各有會惟謹守國土其東南又有萬老高丁機宜二島居於己方國土人物產類相似水程呂宋至萬老高一百七十

四更至丁機宜二百一十更

魏源曰坤輿圖說職方外紀述阿細亞洲海中鉅島曰

日本曰呂宋曰萍泥曰小瓜哇曰蘇門答刺曰則意蘭

曰馬路古

一作木路各

皆西洋市舶所盛之區而馬路古不

見於史史言美洛居爲佛郎機荷蘭其據又不見於圖說外紀其爲音譯相互無疑丁機宜合苗里又小不足道矣乃明史此外尙有覽邦淡巴南巫里白葛達古里班萃等數十國僅謂在東南海中初無疆里沿革不過

漁獠蛋戶西洋所不屑顧而鄭和徧致諸王會史乘概
列諸職方何足算哉何足算哉 國朝互市諸番在

西北洋者皆夷船來市惟南洋則華船往市以冬春往
夏秋歸康熙初開東洋海禁尙未許赴南洋雍正乾隆
海禁大弛鸞帆鷁船萬里遄征然內地商船遠極印度
南洋而止無至小西洋者明太監鄭和亦僅遠至小西
洋無至大西洋者故今志海國以東南洋冠諸首而盡
刪明史諸小島

英夷所屬新埠島

疑卽明史之交
樹山原無今補

謝清高海錄新埠海中島嶼也一名布路檳榔又名檳榔土英吉利于乾隆年間開闢者在沙刺我西北大海中一山獨峙周圍約百餘里由紅毛淺順東南風約三日可到西南風亦可行土番甚稀本巫來由種類英吉利招集商賈遂漸富庶衣食房屋俱極華麗出入悉用馬車有英吉利駐防番二三百又有敘跋兵千餘閩粵到此種胡椒者萬餘人每歲釀酒販鴉片及開賭場者權稅銀十餘萬兩然地無別產恐難持久也

荷大庚英夷說英吉利者昔以其國在西北數萬里外
距粵海極遠似非中國切膚之患今則駸駸移兵而南
凡南洋瀕海各國遠若明呀喇曼噠喇薩孟買等國近
若吉蘭丹丁加羅柔佛烏土國以及海中三佛齊葛蘭
巴婆羅諸島皆爲其所脅服而供其賦稅其勢日盛其
心日侈豈有厭足之日哉近粵洋海島有名新埠者距
大嶼山僅十日程沃土三百里閩粵人在彼種植以盡
地利者不啻數萬阡陌田園一歲再熟卽粵人所謂洋
米是也英夷以強力據之撥敘跋兵二千駐防其地與

新嘉坡相倚角居然又一大鎮矣

明史麻葉壤在西南海中永樂三年十月遣使齎聖書賜物招諭其國其酋長迄不朝貢自古域巖山放舟順風十晝夜至交欄山其西南卽麻葉壤山峻地平田膏腴收穫倍他國交欄山甚高廣饒竹木元史弼高興伐瓜哇遭風至此山下舟多壞乃登山伐木重造遂破瓜哇其病卒百餘畱養不歸後益蕃衍故其地多華人元汪大淵島夷志畧勾欄山嶺高而林密田瘠穀少氣候熱俗射獵爲事至元初軍士征開婆遭風於山輕損舟一舟幸免見此山多木故於其地造舟十餘隻飄然長往有病卒百餘人不能去遂畱山中今唐番雜居源案交欄山爲往大瓜哇婆羅洲必由之地又山高壤沃似卽新埠之地

海國圖志卷十五終

海國圖志卷十六

東南洋

海島之國
原無今補

邵陽

英夷所屬外新阿蘭島即阿塞亞尼洲

一名塞亞尼洲但與歐洲相混

之奧地利亞國同名若但呼新荷蘭又與兩瓜哇相混
故今從地里備考阿塞亞尼洲之名其實音近字殊猶
之奧地利亞國也蓋地理備考以此洲為南洋諸島之
統領故以島名為州名其實亞細亞等皆夷人以意命
名非有故實六合之外聖人不論既放觀宇宙之大不
得不名從主人也

地里備考曰阿塞亞尼洲又名奧斯達拉里亦名大新

阿蘭在南洋之中緯度自南十度起至二十九度止經度自東一百十度起至一百五十二度止南北相距約七千五百里東西相去約九千五百里地面積方三百八十五萬里

又曰阿塞亞尼州卽南洋諸島今合稱爲五州之一也重洋疊嶼地狹國多而以中央之最大奧斯達里亞島爲主其餘各島土產豐饒黎庶不一政治各殊緯度距赤道自北三十五度起至南五十六度止經度巴黎斯午線東九十一度起至一百零五度止

本州東枕大海西接印度海南連南大海北界北大海
暨亞細亞美里加二州

本州四面皆海眾島散布于中合計眾島南北相距約
二萬二千七百里東西相去約四萬一千里統計
地面積方約四百二十萬零五千五百里

本州地分三域一名西亞塞亞尼緯度自北十二度起
至二十一度止經度自東九十三度起至一百三十二
度止島嶼紛繁散布其中曰蘇麻答刺曰瓜哇曰松巴
瓦地門曰美洛居曰塞勒卑斯曰婆羅曰呂宋此西方

諸島國也。一名中阿塞亞尼。又名奧斯達里。卽本州之主島。所謂大新阿蘭者也。緯度自北一度起。至南五十五度止。經度自東七十六度起。至一百八十一度止。其諸島曰新爲義亞。曰盧義西阿達。曰新北勒達尼。曰薩羅蒙。曰北盧斯。曰基羅斯。曰新加勒達尼。曰諾爾佛爾克。曰新塞蘭地。曰疊門尼。此中央諸島國也。一名東阿塞亞尼。緯度自北三十五度起。至南六十五度止。經度自東一百二十五度起。至一百零五度止。各島曰日本。曰馬黎亞納。曰巴勞。曰加羅黎訥。曰慕爾加拉威。曰維

的曰當加曰花和爾尼曰合麼阿曰給爾馬的曰古名
曰都浪哀曰達義的曰包麼度曰門達那曰合威曰斯
波拉大此東方諸島國也三域紛布而以中央之奧斯
達里洲爲主故得阿塞亞尼州之名

本州各島人民約計二京零三億餘口風教不一曰回
教曰釋教曰諸神教曰耶蘇公教曰加爾威諾教各從
所尙

本州各島朝綱視別州無異其中稱王稱漢稱酋稱長
或歷代相傳或庶民自立稱謂各殊彼此不同

本州各島人民不一技藝各殊視他州迥別其黑人惟
林是居無所事事凡日用器物槩不知造其馬來人稍
爲辛勤或佃或漁或駕舟或開礦以爲養生之計至若
陶器多造于巴布阿西亞人簞席多編于羅馬都人其
塞勒卑斯布基斯勒及瓜哇等各島織紡最優工作細
緻其維的當加達義的都波哀等各島工作製造亦屬
精良凡鎔造金銀琢磨玉石刊斲竹木雕刻牙角在在
不乏其最精者乃婆羅瓜哇及布里內西亞各島之人
外人罕到迄今尙莫能悉至于海濱亦未甚詳其岡陵

重疊人迹罕至河之長者曰好給斯巴黎曰馬加里曰
拉支蘭皆在東方其白礬煤炭生鐵等物多產于南方
之中草木花卉靡弗充斥叢林稠密禽獸蕃衍地氣互
異各有不同北方酷熱人莫能堪中央溫和甚便居棲
南方或寒或暑與歐羅巴州相等技藝缺乏土人愚魯
明朝末年有荷蘭人始尋得此地旋以其荒蕪棄去近
數十年英國復徙流民開墾創造故猶存新阿蘭之名
示別于葛雷巴也通島各地有屬英吉利兼攝有爲酋
長管理海濱有東西南北之號其東方又名南新牙利

斯乃酋所屬地方人民鄙陋居無廬舍遷徙靡常蓋洪荒甫闢榛狉之象也東南洋各島林立然至大如婆羅瓜哇日本皆不過長二三千里止獨此島長將萬里廣七千餘里如星中之月且寒暑適平物產繁殖非南極北極下冰海不毛之比故當命爲一州與歐羅巴亞悉亞等並峙焉其屬英吉利者曰昔德內屋宇壯麗貿易日盛曰波德尼卑曰女加斯德爾曰巴拉馬大曰日爾非斯曰馬加利曰非里卑西方曰雷溫曰厄德黎曰音達拉至南方皆屬英吉利兼攝地分四曰奴宜德斯曰

非彝德爾曰波定曰加蘭北方皆屬英吉利兼攝地分
四曰維德曰鬱疊門曰阿爾內音曰加爾奔達里

外國史畧曰南洋羣島最多形勢最大南極出地十二
度四十分及北極二十度偏東自九十二度至一百三
十四度各相連皆在南北黃道帶內故其天氣物產情
形皆相似大山茂藂並多古蹟產物甚貴由此而西各
島分峙第一帶爲蘇門他拉島牙瓦島巴里島倫薄島
偏東一百一十六度土地豐盛居民務農第二帶爲西
里白在羣島之中東界係補東島撒刺益等島皆延偏

東一百一十六度及一百二十四度婆羅島亦在此度內所居族類不一第三帶島自偏東一百二十四度及一百三十度北極出自二度及南極十度大半皆蠻其中有向化者亦奉耶蘇之教食物係沙穀米產丁香玉果等物第四帶係呂宋羣島出米穀居民頗向化多地震第五帶係錫蘭山並五印度羣島族內有兩種其一居各海邊身短色紫髮長其二係土民黑面髮卷而長體短且蠻居林內總計東南島嶼棋布星羅其中央大地無如奧大利亞洲者廣袤方圓約十五萬里南極出

地自十度至四十度偏東自一百一十二度及一百五十四度此地支港不多江河亦少海邊有山嶺其地平坦廣有草場巡遊者雖多終不知其內地形勢之詳其北方近黃道天氣甚熱南方則冷水凝冰結內地低夏時多東北東南等風冬時多西北西南等風天氣之寒煖與別國不同往往冬夏相反雖長亢旱而其露如滴且無烟瘴故外人至者皆服水土樹木約四千二百種高約五十丈便於建船屋數年前其地惟出莠後英人種蔬菜南果葡萄荔枝等樹皆蕃盛尤美花卉因缺水

灌漑惟可植麥不宜禾多野獸無牲畜英船載牛馬羊
豕至日加蕃殖鳥多鸚鵡翠翎之屬海族多蛤蜊螺蚌
而少魚鼈土人極卑陋無衣無宇奔走林內遇外國人
惟求酒食醉卽安睡雖耶蘇門徒教化終無改變明萬
曆三十三年荷蘭初到此因其荒蕪不足開墾遂去故
其島至今尙有新荷蘭之稱非婆羅瓜哇之新荷蘭也
迨乾隆四十二年英國水師官遠尋至此徧覽情形乾
隆五十二年議將徙流之人押配海邊之陂他七港自
後土民始同開墾道光年間四方徧建城邑開港口築

草場闢田畝事勤作不惜耗費更察內地有壤土招農
工年年增益其最重之地曰新瓦里士係東海邊之部
中間磽山而四面平坦牧場甚廣足養牲畜每年剪羊
毛運回本國織造呢絨約七萬石并煎用其油道光十
八年墾田五千四百頃出粟米大麥燕麥苡麥荷蘭薯
共三十四萬一千石遇亢旱則居民食物不足必由他
地運入道光十九年居民共十一萬四千三百口道光
十八年運入之貨值銀四百五十萬兩運出之羊毛鯨
魚油等值銀二百二十萬兩船二百九十二隻道光十

九年運進貨價值銀六百六十九萬兩運出者銀二百八十二萬兩船五百六十三隻其後商賈不誠實外人濫賒濫賣諸行忽倒銀局不能守舊物價皆落商廢民貧賴英國才人設法整頓補救漸復如舊○英人調兵帥管理此地其戍兵三年一易所派文官不多其鄉紳公會皆良民所擇道光四年餉銀十五萬兩二十年二百零四萬兩今又消滅矣新瓦里土形勢似北亞默利加足爲大國此時開墾創建料百年後當爲東南洋第一廣大繁盛之地矣都會曰悉尼城南極出地三十三

度五十一分偏東百五十一度十六分居民二萬六千
城美街廣海隅水深可泊船巴拉馬他海港居民三千
默布尼所屬之菲立港山水四周景尤清妙道光十七
年甫建此邑已廣築屋宇○南邊藩屬地偏東自百三
十二度及百四十一度廣袤方圓千一百五十萬頃平
坦不生草木近地開墾民不過萬此時開墾產物日增
會城曰亞得害

西邊藩屬地南極出三十一度及三十五度偏東自百
一十五度及百二十九度於道光十九年始開此地瀕

海多沙並無產物居民數千口住鴻鵠河邊○北方藩屬地在甲賓他海隅乃道光十八年所開之埠天氣物產俱與南海島無異多產海參山內出丁香土蠻面黑港曰益生頓居民少地面島南極出地四十一度二十分至四十三度四十分偏東一百四十四度四十分及一百四十八度二十分廣袤方圓一千一百五十五里係豐盛灌溉之地所出木料五穀甚多每年出麥二萬一千餘石所養之馬共二千零三十四匹牛八萬四千四百七十六頭羊百二十三萬二千五百一十一頭居

民四萬五千道光十八年運入之貨共計銀二百一十萬兩運出者百七十四萬兩船三百七十隻運出之鯨魚油價值銀二十六萬兩縣羊毛五十一萬三千兩惜僅開闢中央未能偏墾中央都會曰何巴邑居民萬四千三百八十二口老新屯邑居民六千口亦繁盛之港英國新到之貨大半無銀因在兩邑開銀局隨時借貸以扶其民焉。所附之那里佛嶼係流徙所集地出麻萬國地理全圖集曰南亞齊亞地分荷蘭大山與大海洋之羣島繁絮如微塵之數至其列地方西國船戶首

先尋得者呂宋荷蘭等國爲首前百有餘年無人知此等地迨及英國船隻詢問風土人情形勢察出新地無數則將其罪犯徒流之新荷蘭亦有閭閻之民在本地無食物甘心涉重海來此開荒地辟草萊後又異國之民願受一廬而爲氓別有教師離本地以傳耶穌福音之理又有捕鯨魚之船隻巡駛往來與該嶼結交於今通知其形勢而識其地理矣。新荷蘭南極出自十度至三十八度偏東自一百十五度至一百五十度延袤方圓九百萬方里惟知其海邊但其中地無人蹟到也

其江河不多、兩邊乾涸之土、所有山嶺最高者三十丈、天氣暴躁、赤地窮髮、所有禽獸與北地毫無同形焉、其土民素性近於禽獸、惟以草果爲食、以樹枝爲棲、但與白面人往來之際、則飲酒醉、輾轉泥濘內、不穿衣服、男用其女若畜生、痛打惡待、怒則殺之、英國之新民到此地者、種麥粟米、牧縣羊、生意日廣、日盛、毳毛最細、以織呢絨、居民得其奶而賣其毛、所運出者、每歲價銀二百八十萬兩、所運進之物、每年四百萬兩、其居民在各新處、不上十萬、其都乃悉尼、在廣海門、係屬大地之港口、

通商不少但其流徙之匪風俗奢靡居民亦染其毒而離道遠焉有時浩蕩虛費揮金如土有時行銷閉歇銀錢缺乏海口居民二萬丁大半務商內地部落雖多人戶有限務農者鮮以放牧爲要年年搬進新民則六十年後此地乃大國彼時全南海之地必遵其命而服其權焉其船隻現赴到廣州府貿易矣○南海邊所闢之處尙新建屋數間而謂之邑所移人戶漸增又與外國經商故未久而成大國在西邊之新地惟江邊一處初到之民行事不如願現時失望並不得使費以開阡陌

也其北界近於黃道天氣暴熱但其土能產物故英國
調勁兵駐劄此時遍地荒蕪但海濱之石中出海參海
菜燕窩等物件其土人野心不馴焉○地間島海東南
形勢南極出四十度四十二分至四十三度四十三分
偏東自一百四十四度二十二分袤延方圓八萬一千
方里出五穀及薯及各項蔬菜其居民不獨務農乃以
捕鯨爲重沿海港口多不勝數貿易富庶○新荷蘭乃
南方兩島隔以海陝南極出自三十四度偏東自一百
六十度至一百七十八度袤延方圓一十八萬六千方

里峯高及雲雪疊環繞水澤涌泊其土民很心好殺與異族常結仇報復猖獗放蕩令眾人驚畏此時耶蘇之門徒進其地以教化之將福音傳其老幼又令此野人務農作工以除其食人肉之弊○其地豐盛出麻穀菜等物是以英國遷移人口向其土君買田遍開新地佛蘭西亦效法而占據此方○所有捕鯨之船節次赴此港口包兌包送以烏鎗絨毯易各項食物其土人亦登其船而爲水手但性悍難近也○前所言之各地方全數歸英國調兵派官彼土君所管治者泯泯勞勞綱紀

摧殘其中亦有蠻無主皆散林內如獸結羣東南海之
島如新危尼新耳蘭新撒羅門希伯等羣島繁不勝數
其山高亦有出火之峯但其居民黑面短身倚強恃暴
無交通之理只知此島之形勢而已。其大洋海茫茫
一望無涯所有各羣島疏散不密大半褊小之地四圍
有珊瑚石盤近之甚難其山出椰子芋薯餅果居民以
逸待勞晴朗和暢衣服不多既無務事惟取樂而已其
風俗未向化但其中有族循良諫行言聽耶蘇學生又
至其島教以天道開其茅塞發光其心而引向福音不

期士人自將其菩薩一切捨棄真可謂神力無窮蠻心感化也。○其羣島最大之嶼稱曰阿他害地風景清美居民與所屬各嶼欽奉耶穌向風慕義增設學校阿歪希乃繁多羣島之最廣亦歸正教嘉慶十七年奉教主耶穌棄邪歸正盡一無異今時此島之居民大興但人戶漸減其王養弁兵操演練習亦有師船遍海巡駛學校遍地開諭教蒙。○其羣島之居民形體正端但心內埋毒很加羅林羣島最多中有族頗會技藝偶有船隻與之通商。○其賊羣島被是班牙所占據者強其居民

奉教效死不從此外尙有多嶼大半所出物件椰子而已居民最多與外國絕交。佛蘭西國於道光二十二年占據馬耳其沙之羣島以爲新地但未知其情形何如付之數年後可也。

瀛環志畧曰澳大利亞一名新荷蘭在亞細亞東南洋巴布亞島之南周迴約萬餘里由此島泛大洋海東行卽抵南北亞墨利加之西界其地亘古窮荒未通別土前明時西班牙王遣使臣墨瓦蘭由亞墨利加之南西駛再尋新地舟行數月忽見大地以爲別一乾坤地荒

穢無人迹、入夜燒火亂飛、命名曰火地、又以使臣之名、名之曰墨瓦蠟尼加、西班牙人以此倭航海之能亦未嘗經營其地也、後荷蘭人東來、建置南洋諸島、展轉畧地、遂抵於海濱、乃建設埔頭、名之曰澳大利亞、又稱新荷蘭、旋爲佛郎西所奪、佛人尋棄去、最後英吉利得之、因其土地之廣、堅意墾闢、先流徙罪人於此爲屯田計、本國無業貧民、願往謀食者、亦載以來、他國之民、願受一廛者、聽之、地在赤道之南、天氣炎燥、海濱多平土、山嶺高者、不過三十丈、江河絕少、雜樹荒草、灌莽無垠、鳥

獸形狀詭譎與別土異土番黑面披髮裸體食草根山
果結巢於樹予之酒一飲卽醉卧泥中如豕負塗男役
女若畜怒輒殺之英人流寓者墾海濱濕土種麥與粟
草肥茂牧羊孳乳甚速毛毳細軟可織呢絨現居民不
足十萬每年運出之羊毛值銀二百餘萬兩百物未備
日用之需皆從別土運往英人於東海口建會城曰悉
尼居民二萬捕鯨之船時時收伯貿易頗盛而流徙之
戶本莠民飲博蕩侈相習成風流寓良民亦頗染其俗
南境濱大南海英人新徙人戶已成聚落西境亦創置

一屢在江河之濱北境近赤道天氣酷熱產海參海菜
燕窩英人派陸兵駐守以防侵奪計澳大利亞一土英
人四境所耕收僅海濱片土不過百之一二其腹地則
與草叢林深昧不測土番如獸老死無往來不特風土
無從探訪卽山川形勢亦無由乘輶厯覽英人謂此土
雖荒曠而百餘年後當成大國南海諸番島當聽役屬
如附庸也近命名曰南亞細亞

案此卽職方外紀所云第五大洲陳資齋所謂人跡
不到處也野番獸處亘古昏蒙西班牙搜奇天外荷

佛蠻觸海隅英人極意經營可謂好勤遠畧矣

附近此洲各島

外國史畧曰新危尼島一作新爲匿一作新義內在東南廣袤方圓萬三千里居民五十萬山甚高峯積雪海中可遙見之亦有火山火熾民不知耕皆黑面鬚髮不著衣性如禽獸有人上岸卽殺之其內地不知何產荷蘭人於此開埠不服水主守兵多殞於煙瘴甲版船過此島時卽有土蠻來以玳瑁金沙易布匹衣服然所給之衣裳亦不穿用好裸身巡遊尙有多嶼悉荒蕪無人外國史畧曰新阿蘭島南極出地自三十四度二十五分至四十七度十九分偏東自百六十六度及百七十九度廣袤方圓四千二百九十一里居民約十五萬島南多山天氣冷產物少萬厯間荷蘭水手初到此島乾隆間英人駛船始抵此鯨魚雲集恣人所捕而市皆無果田皆無穀獸無羊豕牛民食草根樹葉於是伐木構屋墾田治園種果樹蕃薯麥穀蔬菜置牲畜土民始火

食山高千四百七十五丈土蠻力健勇於作爲形貌平
正性亦良善附近羣嶼尙多皆荒地不毛土蠻如野獸
地理備考曰新義內島一作巴布阿西島在南洋之中
新阿蘭島之北緯度自南一度起至十度止經度自東
一百二十八度起至一百四十七度止長約三千六百
里寬約九百里山勢峻峭叢林稠密島外人罕到迄今
尙莫能悉至於海濱亦未甚詳土產椰蕉沙穀米等物
人民樸陋逐日建篷造船營生謀食通島分爲四酋管
轄其餘各島曰閩必曰薩爾瓦地曰加門曰巴定打曰
非里威里曰當必曰書敦曰阿路內有一島曰外去歸
于的德爾酋長統攝

地理備考曰盧義西阿達島在南洋之中新義內島之
東緯度自南八度起至十二度止經度自東一百四十
入度二十分起至一百五十二度十分止地勢錯落不
相聯絡居民皆食人肉島中備細外人尙莫悉其詳島
之巨者曰羅塞爾曰聖挨南曰音德里加斯德曰雖斯
地曰多羅皮安
地理備考曰新北勒達尼島在南洋之中盧義西阿達

歸之北緯度自南四度起至六度二十五分止經度自東一百四十六度起至一百五十度止地勢錯落不相聯絡火山不一晝夜吐酸叢林稠密禽獸充斥人民紛繁性兇猛島之大者曰新北勒達尼又名比拉拉曰新義爾蘭達又名當巴拉曰約爾各又名亞加馬大曰新阿諾威爾其餘頗小茲不悉載
地里備考曰薩羅蒙島又名新日爾治在南洋之中新義內島之東緯度自南四度起至十二度止經度自東一百五十二度起至一百六十一度止島嶼臚列樹木稠密人烟紛繁遷徙無常島之巨者曰布加曰布加音威里曰三大義薩白爾曰日爾曰亞曰瓜達爾納爾曰三幾里斯多望其西薩爾加島雖小火山吐酸猛烈地里備考曰北盧斯島又名三達古盧斯在南洋之中薩羅蒙島之南緯度自南八度三十分起至十二度十五分止經度自東一百六十三度二十分起至一百六十七度四十分止地勢錯落不相聯絡島之大者七內有火山一座吐酸猛烈
又曰基羅斯島又名新里比里大亦號大西加拉德在

南洋之中新阿蘭島之東緯度自南十四度二十九分起至二十度四分止經度自東一百六十五度起至一百六十八度止中有二十一島大者九曰斯必里多曰馬里哥羅曰三都義至曰義諾忙各曰達納曰三巴爾多羅阿曰澳羅拉曰本德哥斯的曰義羅忙加

地里備考曰新加勒德尼亞島在南洋之中新基羅斯島之西南緯度自南十九度三十七分起至二十二度三十分止經度自東一百六十一度十七分起至一百六十三度五十三分止長約八百里寬一百五十里烟戶一萬五千口地瘠不毛不宜種植人民鄙陋遷徙無常四面小島不一大者曰阿塞爾瓦多畧曰羅牙爾地曰波大尼加曰阿奴諾

地里備考曰詔爾弗克島在南洋之中新加勒德尼亞達斯馬尼二島之間緯度在南二十九度經度在東一百六十五度四十九分甚屬細小田土肥饒果穀豐登地氣溫和中有三島曰諾爾弗克曰尼比安曰非里卑地里備考曰新塞蘭地島又名達斯馬尼在南洋之南緯度自南三十四度起至四十七度止經度自東一百

六十四度起至一百七十八度止分而爲二曰義加耶
馬惟又名北達斯馬尼曰達爲不那毋亦號南達斯馬
尼其北達斯馬尼長一千八百里寬五百七十里人煙
紛繁頗屬強大田土膏腴樹林稠密地氣酷熱海風清
涼諸禽分攝不相統屬其南達斯馬尼長二千里寬五
百餘里人烟稀少田土較瘠南北居民性甚凶狠互相
殘殺風俗鄙陋禮法全無四面島嶼甚多大者曰
布路敦曰半的曰金卑里曰阿加洽曰馬加里
地里備考曰疊捫尼島在南洋新阿蘭之南緯度自南
四十度四十二分起至四十三度三十八分止經度自
東一百四十二度二十二分起至一百四十六度五分
止南北相去六百三十里東西相距五百五十里田土
肥饒穀果豐登叢林稠密禽獸充斥土產銅鐵碧玉雲
石煤炭等物地氣溫和其島爲英吉利兼攝分列九屬
所屬曰斯爾其利經蒙老者斯敦二處則次之本島
曰經乃其
大者也

海國圖志卷十六終